



PAPE FRANÇOIS  
PÈLERIN  
DE PAIX

Les logos et thèmes du voyage du Pape François au Mozambique, à Madagascar et à l'île Maurice

## Ny dikan'ny fitsidihan'i Papa Fransoa ho an'ny Fiangonana eto Madagasikara

Voalohany indrindra dia isaorantsika Andriamanitra noho fitiavany sy ny fitantanany ny zavatra rehetra ary ny fitantanany manokana ny Eglizy ka mbola afaka manatanteraka ny iraka fitoriana ny vaovao mahafaly manerana ny tany rehetra. Isaorantsika manokana ny Papa Ray Masina Fransoa nohon 'ny fitiavany manokana an'ity nosy malalantsika ity. Nasehony ombieny ombieny ny faniriany hamangy an'i Madagasikara ary raha namangy azy ny Biraon'ny Fivondronamben'ny Eveka tamin'ny volana febroary tamin'ny taon-dasa ka nangataka taminy ny hamangiany an' i

Madagasikara dia tsy nisalasala izy namaly hoe « Ho avy aho ».

Ankehitriny, mivoaka amin'ny fomba ofisialy ny daty hamangian'ny Papa antsika rehefa nataony dingana rehetra nanomanana sy nandaminana an'izany ka dia misaotra an'Andriamanitra, misaotra ny Papa Ray Masina fa ho faly isika handray azy. Isaorana manokana koa ianao Son Excellence Mgr le Nonce Apostolique tamin'ny fandaminana.


Isaorana ihany koa ny filoham-pirenentsika Andry Rajoelina izay nanasa azy ho tonga aty amintsika ary vonona ny handray azy.

Zava-dehibe tokoa ho an'ny Eglizy eto Madagasikara ary ho an'ny firenena manontolo izao famangian'ny Papa François ho antsika izao. Andrandraina fa hitondra aina vaovao ho an'ny finoana sy hamelona fanantenana ho an'ny vahoaka malagasy manontolo.

Mifanandrify indrindra amin'ny fankalazana ny faha-30 taona namangian'ny Papa Joany Paoly faha-2 ny firenentsika satria ny 28 avrily ka hatramin'ny 01 mey 1989 tokoa no namangy antsika teto Madagasikara ny Papa Joany Paoly faha-2 izay efa lasa Olomasina ankehitriny ary inoana marimarina fa mivavaka ho antsika.

Ankoatr'izay dia misy fankalazana maromaro hanamarika ny Fiainan'ny Eglizy eto Madagasikara sy ireo fikambanan-dreljiozy sasan-tsasany amin'ity taona ity ka mifanojo indrindra amin'izao Famangian'ny Papa Ray Masina antsika izao :

Ny diosezin'i Morondava dia hankalaza ny faha-100 taonan'ny nanaovana Batemy voalohany tao amin'ny faritry ny diosezy, izay manambara ny nidiran'ny finoana Katolika tao amin'izany faritra izany.



Tsaroantsika angamba fa ny 07 jona 2009, no nanambaran'ny Papa Benoit XVI ny naha-olontsambatra an'i Fr. Raphael Louis Rafiringa. Feno 10 taona amin'ity taona ity zany. Tao amin'ny fikambananan-dry Frères Des Ecoles Chrétiennes, moa no nisy an'i Frère Raphael Louis Rafiringa, ary io fikambanana io dia mankalaza ny faha-300 taona nahafatesan'ny Olomasina Mpanorina azy, dia i Md Jean Baptiste de la salle. Asongadina amin'izany fankalazana izany ny lanjan'ny fanabeazana ao amin'ny sekoly katolika izay nimatimatesan'ity olomasina mpanorina ity. Fantatsika ihany koa ny anjara toeran'ny sekoly katolika eto amin'ny nosintsika.

Hanamarika ny faha-50 taona nahatonga azy ho "Province mahaleo tena" koa ny fikambanan'i Jesoa izay fantatsika amin'ny fiantsoana hoe "Zezoita", amin'ity taona ity.

Ny zezoita izay azo lazaina fa anisan'ireo fikambanana mpamaky lay tamin'ny fitoriana ny Vaovao mahafaly sy ny fananganana ny Fianganana teto amin'ny nosintsika indrindra taty amin'ny faritra afovoan-tany sy atsimon'ny nosy.

Ary mbola mandray anjara mavitrika ankehitriny amin'ny fitoriana ny Vaovao mahafaly amin'ny sehatra maro samihafa. Ny Papa Fransoa rahateo dia fantantsika fa ao anatin'ny fikambanan'i Jesoa.

Entintsika am-bavaka, mba ho tonga soa ama-tsara eto amintsika izy; ary hitondra aimbaovao ho antsika anie ny hafatra entiny ka hanamafy ny ezaka ataontsika hampanjaka ny fahamarinana izay antoky ny fandriam-pahalemana.

*Misaotra antsika mianakavy*



*Ny Kardinaly Mgr Désiré TSARAHAZANA Prezida ny "conference épiscopale" ny Madagascar*